

1979-10-04 – SS Ioannes Paulus II – Littera ‘Ea Est’

IOANNES PAULUS PP. II

LITTERAE APOSTOLICAE

EA EST

**TEMPLUM MONASTERII B.M.V. DE RUNA-ALTOVADO, IN DIOECESI
GRAECENSI SECCOVIENSI, EIDEM B.M.V. CIELO RECEPTAE DICATUM,
TITULO BASILICAE MINORIS HONESTATUR**

Ad perpetuam rei memoriam. Ea est Beatæ Marine Virginis dignitas, ut, licet amplissimis honoribus afficiatur, maioribus usque cultu, reverentia, religione ac pietate digna sit: nam et Christi, Filii Dei adorandi, Parens sanctissima fuit, et nulla umquam peccati labe est Dei beneficio maculata, et una mortalium post mirabilem confectum curriculum vitae, cielo recepta est cum anima et corpore, ubi inter caelestes micat lucidissima stella. Qua re, cum Ven. Frater Ioannes Weber, Episcopus Graecensis-Seccoviensis, litteras dedisset, quibus, nomine dilecti Filii Pauli Rappold, ex Ordine Cisterciensi, Monasterii B.M.V. de Runa-Altovado Abbatis, id petebat, ut templum simul abbatiale simul paroeciale Sanctæ Mariæ Virgini dicatum in caelum assumptæ, titulo ac dignitate Basilicæ Minoris honestaretur, Nos, ratione quidem habita tum ipsius sacrae aedis, quæ antiquitate, arte pulcherrima, maiestate commendatur, tum pietatis erga Deum eiusque beatissimam Matrem qua nitet – nam hoc pluris est – bene fieri censuimus, si admotis precibus aequè concederemus. Quæ cum ita sint, iis probatis quæ Sacra Congregatio pro Sacramentis et Cultu Divino, factis olim a Nobis facultatibus, hac de re statuerit, apostolica Nostra potestate templum Beatæ Mariæ Virginis, de quo mentionem fecimus, in Basilicarum Minorum numerum redigimus, cum iuribus atque liturgicis concessionibus quæ talibus templis fieri solent, modo ea servata fuerint, quæ Decretum «de titulo Basilicæ Minoris», die VI mensis Iunii, anno MCMLXVIII, factum, præcipit. Contrariis nihil obstantibus.

Datum Romæ, apud S. Petrum, sub Anulo Piscatoris, die IV mensis Octobris, anno MCMLXXVIII, Pontificatus Nostri primo.

AUGUSTINUS Card. CASAROLI, a Publicis Ecclesiae Negotiis